

LEGNADIS E PIDADIS

O vin pore di jessi un'atre volte dibessôi, o scuasint, a tignî dûr il claut de libertât furlane. Bessôi e sfladâz: intant che a Rome si rumie un colpat çanp che par une trate al tornarà a cjolnus il flât. E son cuindis mêš ch'ò butin fûr i bugjêi par metjur te côce ai furlans l'inpuartance di cheste ore e di cheste canpagne, par vuè e par doman.

No son pôs i amîs de Furlanie, i siei fedêi: ma si trate di amôr platonic, fat di peraulis, di cjantis, di contis di sagris, no di muardudis, di sgrifignadis, di lote e di difese, ch'al è ce che vuè al covente di plui. O che si trate di un amôr inturbidît e bastart, di un amôr distrat e dividût cun âtris amôrs, disfreidât e inberdeât di intares di partît e di tacuìn. Ungrum di int, di brave int, che sta a cjalâ, magari a criticâ, ma che no da une man, che no mole une sburtade nè cu la lenghe nè cu la pene nè cui carantans.

I siôrs no sintin di chê orele o che no vuelin mostrâ la muse; i puars, ancje se sintin, no àn pussibilitâz, no àn timp, no àn scuele.

La Furlanie e duâr sul ôr di une ruvîs. Doman si dismovarâ dapît e si lamentarâ; ma nol zovarâ nujâtri. Doman cun Vignesie o cence Vignesie, si sintarà lis mans leadis, il smuars in bocje, la cjavece peade intôr de scrassigne romane, sinpri plui dismenteade, sinpri plui menade pal boro e parade atôr di une sdrume di cabibos, di sanguetis di controlôrs e di comandanz.

Nus fasaran l'onôr di lassânus in vuaite sui cunfins, par durmî il lôr sium plui cujez; nus sglonfaran di flât de solite zonte di balis nazionalistichis; nus domandaran di tignîdûr, di cjapâlis par lôr, di fâ di roste, di trincee, di parefango. E s'ò domandarìn alc sore cu la solite umiltât e rassegnazion, nus ridaran su la muse.

Poben, e varan reson! Vuè la pulitiche e jè cussì, in dut e pardut: cui ch'al bae e ch'al muart al è rispjetât e contentât, e a cui ch'al leche e chal mene la code, legnadis pe cope e pidadis tal cûl.

(Patrie dal Friûl – 15/5/1947)